

四庫全書

集部

欽定四庫全書

集部

學餘堂文集卷

二十四

詳校官檢討臣劉錫五

助教臣常循覆勘

總校官庶吉士臣何思鈞

校對官編修臣閔懋天

謄錄監生臣嚴儀

欽定四庫全書

學餘堂文集卷二十

翰林院侍讀施閏章撰

墓誌銘

平樂府知府贈太僕寺卿尹公墓志銘

尹氏系出周吉甫始家齊之臨淄元末遷為吳縣人累傳至君考諱天章始以儒顯君諱明廷字冥階孝謹溫秀尚氣誼所與游皆名士為文揭揭耀一時順治己丑

登進士除廣西平樂知府故事知府秩四品例不得初授是時

王師方畧定兩廣官皆從軍地尤荒遠數叛服故特用異數人猶趨趨憚行君獨慨然亡畏色崎嶇長沙衡永間一歲始抵郡確壤惡灘遙獐錯處兵火後白骨委地民竄走山谷中君招徠摩撫掩骼闢野中要約禮羈舊延秀良匪庶蘇蘇若甦羸得藥粥兵卒有輶轢吾民者君力戢之弁者庇兵至以身受齟齬不稍悔祿入不贍

脫其妻手釧質米分守周公永緒巡按王公荃可聞之
改容稱歎曰是真良二千石而握兵吏頗不懼順治九
年秋七月寇陷桂林定南王自剄死潰兵浮尸自灘江
接昭潭遠近震駭君募勇士誓死固守十餘日而郡城
庠薄呼援兵無一至賊入脅降罵不屈斷一股一臂至
死猶踞地罵郡人為泣而瘞之死所事聞

天子嗟悼詔贈太僕寺卿賜祭墓廕如禮初平樂之聞
亂也刑部主事施閏章奉使在郡歸必道桂林君謂省

會危機不可蹈留治裝東下蒼梧已而桂林報陷乃置
酒與閨章訣曰君使客也宜亟行某守是死矣余泣下
君猶強飲語笑如平時其志定也死之日為順治壬辰
七月十八日年四十三夫人徐氏明翰林詹事汧之從
孫女生二子長正始吳縣諸生今以蔭入監讀書次正
雅女一嫁虞山陸氏君殉難之明年六月正始從間道
奉君骨歸又三年走山左來乞銘余故君同門進士最
相善君又嘗脫我難讀其狀慟絕銘曰

生東吳兮死西粵嬰白刃兮氣不折昭之人兮腹斷絕
昭之水兮聲嗚咽振令名兮君莫哀

寵命卹兮天昭回遊大荒兮魂歸來君騰而上兮閭闔
開

故徵君晉州知州陳公墓志銘

陳徵君者南昌之新建人也諱弘緒字士業用徵辟得
官仕不稱志四方多稱之曰陳徵君及其歿也皆驚悼
曰嗟乎陳徵君死矣至為出涕君傳聞強記長於文辭

下筆輒千百言少補諸生以父蔭當得仕京朝不就曰
吾自取之所與交同郡萬茂先時華徐巨源世溥劉士
雲斯陞萬美叔曰佳余小星正垣輩凡十餘人皆知名
君進而折衷於道德學益醇其文章闕達浩衍出入歐
曾諸大家以其餘溢為詩風雨馳驟士大夫遜畏其才
而卒以不售崇禎中兵寇交作文吏多棄城失職上寢
厭科目為亡用特徵處士賢良奇碩者巡撫中丞劉公
宗祥以君應詔君在途擬上書見天子言事至則不得

召除知晉州晉故偁畿輔守禦無備君百計修繕儲芻粟治火具甫三月而晉受圍君登陴誓死守衆皆感奮環攻七晝夜不下乃解去當是時真定屬邑大城多潰而晉以褊小獨全莫為上其功坐不肯納閣部劉宇亮兵入奪民居中蜚語逮繫而晉州數百人走訟冤闕下得釋不問謫經歷湖州權長興孝豐兩縣事遽完逋餉改知舒城縣巨室濮氏與巡按御史有連秉勢撫事脅州縣罔敢拂君獨怒叱之居亡何為御史臺所論罷君

剛介寡合不樂州縣而是時天下重科目數百年君又不以是進故三歲三易官卒坐罷斥於是徵辟之典寢壅格士皆卧不起而天下事日壞久之太宰鄭公三俊強起君安廬監軍推官逾年甲申遂有京師之變慟哭累日絕復甦君故自負史才至是馬士英等用事南京殘滅善類給事中馬公嘉植荐修國史不赴蓋知金陵之必敗也丁母憂廬墓西山輯南宋遺賢錄以見志山中盜起求躬耕不可得順治癸巳始置一樓章江上作

江城懷古詩六十首讀者多隕涕中丞蔡公制府張公
聞其名先後禮遇張公屬修南昌郡志成書五十卷四
方以他文請者盈筭堆案皆立應人人滿志去康熙甲
辰六月病噎明年乙巳三月五日端坐卒享年六十有
九所著石莊集恒山存稿寒崖集鴻楠編留書凡若干
卷行世其藏於家者周易備考詩經羣義尚書廣錄山
房讀書跋江城名蹟記晤齋詩荷鋤雜志等書又十餘
種君性疾惡議論侃侃及發諸文詞罕所刺譏服官清

慎俸入輒購書繫車舁還家人發之咸相視歎笑家居
食貧客至未嘗不留當事有造廬者指陳古今利病以
經術自任語終日不及私有得輒記謂之病榻雜語最
後咯血將歿前數日猶為王祠部士禎作詩序蓋絕筆
云君生萬厯丁酉十一月十有二日考諱道亨萬厯丙
戌進士南京兵部尚書贈太子少保謚清襄妣劉氏誥
封夫人曾祖諱標祖諱瑞並贈兵部尚書曾祖妣余祖
妣袁並贈太夫人君娶熊宜人善筆札凡所屬草皆熊

為書先二月卒生女一副室王氏生二子淙澍皆諸生
淙早卒娶周教諭以璇女年十八守志澍篤孝力學廩
於庠娶熊封君洪奎女幼子潤妾魏氏出女二人一適
湖廣左布政使熊公宇奇子啟峻早卒一適尚書劉公
定國孫紹節將以某日塋君某山之陽孤澍泣具狀屬
其同姓兄允衡來請銘曰父命也予既敘其文又詳其
行事銘曰

謂子為窮富有文史謂子為達三仕三已其誰為之俾

豐於此而嗇於彼嗚呼命矣

前翰林院編修吳公墓志銘

歙縣前翰林院編修吳公天石先生年八十以康熙六年丁未閏四月二十九日考終於家又十一年丁巳八月二十二日始卜塋於龔山先壠之左孤夢龍從龍等來請銘閏章於公為後進然嘗獲飲公坐上且序我天都遊草不可卒辭蓋歎公發聞之盛罕所施用而引退之早遂終老巖穴間也公諱孔嘉字元會天石其別號也

遠祖出海陽唐左臺吳少微公後繼自海陽遷歛豐溪
之南九傳至貫之公族益盛冠蓋閭閻接巷填間溪南
之吳名天下五世祖有賢處士諱榮讓事節母程以純
孝稱公考贈編修公諱某母曰殷太君大司徒殷公女
孫公少有俊名萬厯乙卯舉南畿鄉試天啓乙丑進士
廷對一甲第三人授翰林編修是時公方壯年入吏局
預纂修實錄同館文譽以良史才崇禎改元上將踐祚
故事勸進有三箋值公屬草時中外危疑羣奸未靖廷

議洵洵上方憑几待旦政府諸公慮三箋濡滯公請用
權宜連進三箋典禮亡闕俄而箋奏畢徹殿陸歡呼天
位遂定政府皆以公為能一時覃恩制誥皆出公手戊
辰會試公例當為同考官以族人有與試者引嫌辭之
公故美丰儀每入侍經筵上竦顏傾聽賜璽書有啟沃
詳慎之褒而公未第時贈公已早世公飲痛終天又念
太夫人老意有不自釋者遂決策乞骸骨歸養詔許東
傳館閣公卿設祖帳都門外觀者塞路以為神仙中人

蓋公年甫四十也公孝思迫切初及第謝恩即草陳情
一疏為先世程太君及榮讓公請旌節孝得異數報可
恩追五世至是旋里被賜衣拜堂下跪進太夫人冠帔
鄉父老相望咨嗟泣下曰孝子之顯揚其親固如是矣
公奉養十載太夫人以天年終喪葬盡禮公終卧不出
而國事亦日壞公為人不斷絕物人皆樂從之游不
干公府遇鄉國有大利害則慷慨力言當事者以其賢
爭禮之故用其言為多順治乙酉

王師初入境郡民駭竄山谷公急冒鋒刃馳見提督張公請不戮一人以定民情提督竟如公約戊子豫章兵變郡壤接多煽亂兵憲盧公會鎮師撲剿村落近賊者牽連俘獲公又泣爭之兵憲從馬勃間脫難婦數百口皆號哭羅拜而去曰吳太史活我郡即數被兵豐溪一帶雞犬晏然無一騎卒入村巷皆公力也公好客獎借人才既老與客飲午夜不倦詩文操筆立成年既耄而視聽不衰及其歿也人皆哀之論者謂其情寓林泉似

白太傅惠洽鄉閭似范文正云公生明萬厯戊子年十一月二十九日元配封孺人程工部郎中太蒙公女相公四十餘年黽勉始終婦職畢舉先公十五年卒公自為狀副室余孺人羅孺人繼秉內政先後舉男子四人道長夢龍從龍光龍公平生多義舉能赴人急故太常鮑公應鰲天啟間以王事盡瘁給賜塋地子貧不能守公為白郡還塋仍樹碣題曰明太常卿袁素鮑公之墓郡司李溫公璜偕妻女殉節郡城三喪藁塋公為文以

祭餼賻百金招其子郊瑞扶櫬歸吳興士大夫多頌之
所著有玉堂咏草臣鑑彙編知非錄後樂堂等集藏於
家初公未釋褐夢太傅許文穆公解表衣之公與文穆
生同邑及第同後先乙丑又同所乏者十年太平宰相
嗚呼豈非有幸有不幸哉銘曰

公初奮跡時孔艱難道不可直賢者永歎乾綱易位公
已勇退終改國步蹇獨處晦嗚呼黃山蒼蒼豐水洋洋
身隱而文泉石之光

潮州知府吳君墓志銘

故潮州知府漂陽吳君卒數年將塋於某山之阡使朱徵銘余嘗官比部為同舍郎初見不煦煦久而逾篤知其君子人也君諱穎字見末別號繭雪順治壬辰擢進士高第授刑部主事遷郎中會

帝求直言詔許七品以上官得無隱君疏言刑獄至重律無正條者毋得刻深以意傳法其初詞既具無復株引滋它蔓

帝頗採用其言命恤刑福建凡五月不刑一人曰吾以恤米也爰書末減者千餘人御史李某以多失出疏論覆視無他得不坐出知潮州潮西山曰五指石者故藪賊置兵三千更戍民苦為兵役且奪廬舍君請減其半又畫策別建營房民始有寧宇潮屬邑皆駐兵而兵餉輸府以給府益利其羨也君請令餉就縣支不復輸府兵皆稱便間以農隙修學宮及饒平壩韓文公祠月朔課諸生拔其高等士多藉成就君秉性和平而勇於為

善嘗視推官獄案固爭出死罪三人會歲凶請免大城
所屯糧宿逋數百石持之力失司計者懼是年癸卯從
內大臣及督撫中丞巡視海上中寒疾投劾自免適舉
計吏典遂註病歸逾十六年卒於康熙戊午二月六日
年七十九矣君初為諸生治經藝好奇見黜於學使葉
氏葉閩人也君使閩葉氏子有懼心顧遇之加厚人以
為長者少與同邑陳公名夏友善及通籍陳已當國君
視之如布衣時所與論詩推高淳邢昉孟貞江寧顧夢

游與治最舊皆窮交及在比部號多詩人君最為老宿
當其援翰命篇清真澹逸視它人所為工者不顧也然
亦絕口譏訶晚築西疇草堂日有咏課一時碑版撰記
多出其手有蓴羹堂集漂詩選等書百餘卷行世未刻
者尚十餘種其先家吳中由楓村徙漂陽為處士洽之
三傳為奉政大夫士衡又五傳為君考贈朝議大夫心
齋君配曰虞恭人先七年卒有子四人嘉稷邑庠生嘉
穗恩貢生並考職將授官嘉稔例監生大臨己酉武舉

人女二一適史棟次適狄翼經並文學孫曾男女三十餘人可謂蕃已銘曰

官亡巧名亡競才冠諸曹仕終一郡拂衣蕭然貧矣非病何以報之壽考終令其文既豐不減其窮瀨水之裔白雲溶溶曳杖相羊或在其中

前贈文林郎直隸大名府推官霖海張公墓志銘
安丘張子貞從余遊能文章不遠千數百里來國門乞銘其先大父霖海公墓問其生以明嘉靖七年九月卒

萬曆十五年四月四日到今且百年銘不已後與曰先
人嘗磬石於墓不得其人寧闕焉先大父不獲以位顯
事具邑東鄉父老能言之文獻徵矣即百年後銘自先
生始其誰曰不宜嗚呼聞是言也孝子慈孫之意戚矣
公讀書好古雖業經生言不渴功利嶽嶽然寧矯毋隨
故多高行中年未舉子妻王請納勝固強乃許勝至有
殊色餘淚霑面詰之故名家女也公矍然心悲立遣歸
不索值女泣謝且祝曰天乎張公德厚其連畀三子以

昌之後生子竟符其言自奉刻苦布衣藿食一摺扇用
之常數年曰吾雖不酷貧分固如是也懲世俗厚塋手
勒為遺令瘞以柳棺疾草時三子尚幼而從子書紳已
舉於鄉召詣榻前授橐中千金曰此嬛嬛者弗能守汝
需其長歸之毋使孺子以懷壁賈罪從子唯唯納食器
中昇去人亡知者後十餘年書紳大會宗親還金如故
人皆曰孝廉君誠長者微公盛德能知人奚能有此而
生不膺一命年止六十悲夫子嗣倫萬厯壬子舉人繼

倫天啟丁卯貢生緒倫崇禎辛未進士湖廣道監察御史公由是得贈文林郎始御史在娠公寢疾顧謂王孺人曰汝腹男也且將大吾門公生平不信機祥而所言類前知竟莫能測也女一適諸生馬爾駿孫二人喜聞諸生貞拔貢生嘗辟博學宏詞以憂未赴今候補翰林院孔目曾孫在辛在戊在乙皆貞出貞之言曰吾伯叔不幸皆亡後貞不肖獨有三子惴惴奉蒸嘗惟先德泯滅是懼余觀其叙列家傳具矣先世自山陽徙居安丘

公大父澄以明經主簿武安父守蒙為諸生公諱民感
字爾孚邑諸生別號霖海墓教山之阡銘曰

其行子子疇則涅之其守墨墨疇則揭之匪即於私莫
我忍欺惟遠乃耀昭以永垂

封文林郎城固縣知縣毛君墓志銘

上徵天下博學宏辭之選百五十人集京師其與章善
者毛君際可其一也出其先公太素先生狀無夸辭而
讀之歔歔至流涕信毛君之孝能有文也是時先公歿

八年矣泣曰願有辭以納諸隧嗚呼狀若是銘奚加焉
毛君嗚咽再拜請曰先府君善屬文際可不敏亡足稍
當意且其所嗜為文者非今世之文也年十八補諸生
不樂舉子業聚書數千卷丹墨淋漓幾漫不可辨與人
恂恂而為文奇肆日有聞先是汪中丞喬年未仕時公
從之受業汪奇其才數抑以繩尺始折節揣摩更獻所
為文數十首汪大喜稱善徧示坐客府君退語人曰聊
以見吾非不能耳是豈足名吾文哉卒掉頭為奇肆如

故庚午秋闈牘已中選以過奇置額外是時主試黃公道周固以奇文名世者也府君卒以奇失之異哉顧益洋洋喜自負曰吾老矣姑以貽吾子久之際可廁名進士府君不色動嘗就養樂城官舍誠曰汝先世作官無長物子孫未嘗凍餒汝無憂後人毋宴安是圖而以疾苦遺百姓居無何無疾而卒年七十六性狷立寡嗜好喜赴人困急不責人報佃戶入秋租雜以稗濕置不問後歲稔或不能自給亦無餘悔居家孝友多不言而躬

行吾懼無以顯吾親也子其為銘嗚呼文合乎古不取
容於時君子之行也且約己以厚物稱祖德而翼其子
以成良吏也嗚呼其可銘也已更數日徵諸其鄉人方
君象瑛宗人升芳皆亟歎稱其賢以為實錄云公生前
明萬曆丁酉五月二十四日卒於今康熙壬子五月二
十二日以遇覃恩封文林郎城固縣知縣初娶童孺人
繼室徐孺人子際可戊戌進士今官祥符縣知縣有廉
名毛氏系出姬姓毛伯之後天寶間遠祖羅自江山遷

遂安至希成公六世同居號曰義門又四傳生化州二
守志涑涑生前壬辰進士一瓚官吏部郎瓚生思程公
國章廬墓稱孝子有子五人公最長諱之履字爾旋里
中稱太素先生銘曰

偉矣先葉世目義門皇考紹緒力孝發聞爰篤我公大
肆厥文糠粃雕綺樂礪丘墳疇駑而騁疇驥而蹶羣攘
以趨我掉不屑嗚呼不以貧戚匪以子貴昭德勒銘厥
聲弗墜

汪覺非先生墓志銘

公諱如江字觀瀾其先出歙州越國公數徙而家揚州
曾祖克臣祖天澤世以軍功襲錦衣衛千戶父敬菴公
獨尚儒術生公晚而教督嚴甚公少力學修行業以親
老服勞奉養遂終布衣公為人樂易好游多智畧能緩
急人卒得人死力明啟禎間南歷楚越北走燕趙游於
名公卿貴人是時中原寇擾北軍無見糧公挾策說執
政請持帑金數千就糴於楚苦盜警乃甕其金置酒船

以往得糧數萬斛募沙舶汎海達邊司餉大悅上其事
將授官不果歸已而寇犯鳳陽宣言渡淮揚人練鄉勇
保障推公掌約束而閭井無賴多藉兵以逞有河北少
年裘馬弓矢隨數騎來衆執為盜君力白其良士果大
學士范公景文子也巨佑李氏者數人至自河南周藩
府擁金巨萬豪侈不甚益藏游徼利其貲將掩捕以大
盜論公急誡之曰盜不可誣坐果藩客也若屬無種矣
吏懼緩其獄尋得白佑盛幣拜謝公不受數人者欲甘

心諸游徼公又善解之乃已劉莊場富民某訟繫於官
出數百金屬援尋事解還其金某愕然公曰實無須多
金也卒還之某感泣其後

王師下揚城某先掉小舟冒白刃徧索諸城中載公歸
居其里時時供饋不絕公初不甚貧篋中多積券不校
少子舉甲乙科南北往還又告貸於人及官內閣中書
舍人以文章名四方于旄之使走贄幣於庭公悉籍親
交所贈貸示之俾持金造謝如其數公乃權曰孺子差

不負人始揚州被兵時淑配李宜人自投井中得不死
以出公難髮匿僧廬兵至驅諸偽僧盡殺之而公獨無
恙聽其引去人僉謂汪長者之報其卒也以康熙十五
年十二月五日正襟而逝得年九十一公生於明萬曆
十四年正月二十一日元配李宜人先公三歲卒內閣
大學士益都馮公志其墓有四子振麟兆麟早卒次耀
麟揚州府學生又次懋麟康熙丁未進士所謂內閣中
書舍人者也副室某氏生一子起麟女子二人孫男六

人蘅荃蔭艾芊菓女孫九人曾孫一人公老年碩德自
號覺非居士前郡守趙公具書幣造門請為鄉飲大賓
衣冠偉然有神仙之目嘗手飼一鶴見則迎舞銜衣及
公病輒不食數日亦死舍人與余以詞學相友善故來
請銘銘曰

以俠游以儒顯匪賢雄善則腴鬱未仕昌厥嗣官所司
在文字子既名行益醇年大耄垂令聞更百季視斯文
處士汪長公墓志銘

汪長公者歙潛溪處士也里中高其義稱汪長公云其
先自晉唐為顯族宋宣議逸菴公始遷潛口五傳至文
學義芳文學生太學生如珩王元美先生常作傳志又
三傳為長公諱以功字惟敏父文鑑服賈長公受書治
博士家言雅好閱覽會不造於家父賈汴使來召曰而
翁糊口四方而安坐咕畢乎其亟修而翁業長公不得
已戴經而賈是時父寡汴室舉子一女二敕長公賈饒
州既南發俄心動歸省母適寢疾侍湯藥三歲卒執喪

盡哀目為之青既薨趙汴侍父所無何命賈昌江聞父
病遄反痛不及訣矣扶觀奉汴母歸復之汴收責李賊
圍汴久不解城中人相食長公煮所市藥物及革褐笥
篋餉之人多藉存活賊決河灌城漂溺亡算長公縛糧
棟為棹乘屋巔會中牟令王公以舟援得脫乃引而南
客揚州乙酉揚將受圍決策先出且亟呼所親母坐次
圍城中族子某不聽於是別瘞金十鎰緘片楮強授之
曰若有急發視及城破枕尸相接兵持之急啓亟發瘞

金得不死長公雖賈游多智能喜赴人困阨始遊吳客
有死逆旅厚殯載歸其脫揚州而南也江城列卒登陴
鋒刃載路生死爭呼吸秣陵故人張叟屬以弱子曰其
濟則公之子也長公挈歸周卹匿山谷間亂定始歸張
父子環拜而泣人是以多長公族無賴子橫干之宣言
容汴寄公金若干可反我不應則構之對簿官入它言
不得直歎曰命矣乎遂棄金當所訟長公賈敗於汴於
揚又敗於訟由是金立虛有吳公者知長公客豪委金

累數千俾主鹽筴人言汪長公窶矣奈何吳公不聽長公卒經紀以羸歸之人乃歎長公真長者年六十八康熙乙巳十一月八日卒妻方孺人歲進士明宇公女生子徵遠籍諸生娶嚴溪方忱公女一女適潘氏早卒長公棄儒而賈手不釋書用程督其子卒用文學顯於世為名人銘曰

儒也市為徒吾烏知其儒賈也維古處吾烏知其賈其積不羸其聲不隳表黃岳以為碑嗟後之人其知之

顧貞譽先生墓志銘

蘄州處士顧重光先生年七十有五以康熙癸卯十一月二十七日卒逾年其子景星書來請志其墓中之石先生諱天錫重光其字明福建按察司副使諱闕之孫通判南昌諱大訓之子其先崑山人遠祖諱士徵為元進士總管蘄州路遂家蘄六傳至闕與其兄問皆嘉靖進士官並藩臬有顯名先生挺特喜壯畧學無專家初冠通書禮春秋著三禮三傳集解為文露崖崿光焰當

世聞人鉅公亟歎為奇益喜自負試有司益困輒憤甚
嘗傳粉狂走挽伶人拍歌嘯號不自禁愛茂林大水載
書孤艇旬日不歸病下血輒斗許久之北遊為國子生
亟賞於祭酒朱公之後積試有聞太僕卿米公萬鍾館
於海淀之勺園從游以子弟轉客天津講禮河間保定
二郡著戴儼四卷是時弟子日進而天下兵日擾再試
北闈不中歎曰難將作矣盍歸隱先生喜著書論經史
尤涉意天文厯算醫卜導引之書試之往往驗嘗論明

大統歷刻漏之誤與西洋歷學失得縷分髮析人莫能
知卒亦不用崇禎戊寅四月月犯熒惑大司馬楊公嗣
昌以後宮藩鎮為言先生聞之曰是占貴臣出大將死
也楊卒死於寇如其言其後流寇渡河蘄黃間災異疊
見先生課家人負擔環室走為避亂計癸未正月寇屠
蘄而先生家獲全甲申聞國變上殉社稷痛哭不食者
二日嘗著歷代改元考二十一史評論五經說等書修
蘄州志又避兵居澱湖為隱騷四章詰曲鬱奧不忍卒

讀蓋勞人義士之所為飲泣也歲饑嘗辟穀嚼側柏葉
飲水鹿裘石几冠雞羽冠冬以氈裹腕錄書養雄雞五
七皆有名目雞亦不雉至八九年聲如老人歎初鳴即
起坐服氣久之數歲不復卧不與人通著素問靈樞直
解冬病作下血索冠履危坐曰吾去矣童子勿扶叩齒
而逝頂蒸蒸然熱逾時明旦俛歛屈信如生遺命合以
瓦缸曰毋棺毋怛化毋受弔奠毋刑牲毋封毋樹今厝
於時思圃之貞節坊予一人即景星博學能文辭女二

人適名族孫男七人皆幼先生少失父母鞠於劉氏姊
嘗以貞節被旌終身母事之執其喪甚哀所著書存者
二百二十三卷藏於家士大夫汪衡等痛先生學行不
為世用私謚曰貞譽先生國人以為然銘曰

知道之將蕪發憤以著書知國之將墟卷跡以全軀知
生之必徂守靜以致虛是殆與造物者為徒而吾儕之
區區安知其所如

明處士章獻仲墓志銘

處士諱其修字獻仲宣之湖北人湖北族大而名者南
姥章氏章氏處士之雄曰獻仲其先為宋侍郎燾故太
傅仔鈞公裔也燾生子十人綱純並乾道中進士族用
以張始自南姥分婁溪又十餘傳至君大父羅塘公諱
汴從居士橋稱土橋章氏羅塘生見字翁諱應科是為
君考執親喪廬墓三年兄遺孤坐仇構幾死傾橐中裝
出之由是得孝友聲君其仲子也少有父風用行誼世
其家性故好客客坐常滿家南湖之濱枕山帶水畊漁

為俗君獨坐一小樓汎覽百家及古今名人書畫聊取
適意不治經生言艇子進魚則父老昆弟賓客接席列
坐舉酒烹鮮窮日為懽笑不知塵事之撓懷也以此自
號義皇上人家故不甚貧不喜談錢穀人告之急則應
嘗如廁拾遺金需其人歸之乃去至今耆舊談遺事猶
交口藉藉焉君生明萬厯甲午二月十九日卒崇禎甲
申六月二十四日年五十一配孫氏吏科給事中襄姊
也於章氏之室家內外靡所不宜蓋後君三十年以八

十考終塋不及祔男子二人長三賓邑諸生文而賢次館賓稱長者女子一人孫男二人逢璿逢堯孫女二人曾孫女一人處士君既不仕罕所表見或曰處士多隱德躬行而不言世莫得聞故自還金而外亡傳焉始吾先大父中明府君講學湖北嘗買地治冢褒山之陽蓋得之章氏云館賓氏以銘請其忍辭銘曰

山之隰湖之裔韜厥德有處士人食德翁不言問幽宮

惟竹園

東城兵馬司指揮施君匪莪先生墓志銘

游天下士大夫同姓之能言者五六人其來官於宣而
狎遊莫如故司訓匪莪先生匪莪為人好文學人有贈
之言者裒集不遺一字積為大帙其所訓贈人皆手自
書尤喜集唐人成句為詩切情指事昭合渾成工若已
造多至累數寸不倦為宣城訓導以此餽郡邑長吏上
學使者皆禮重之剗氏滿官舍用薦為范縣則載版
以行又遷而為司城亦然京師名人游士酬接煩促所

善翰林編修沈公荃同姓侍御史維翰尤亟推引朝貴
日聯車騎就取其書悉脫贈不受一錢又時時觴客坐
是耗官俸盡而是時君已老矣余嘗入其署視所殺青
牆立而山積輒調之曰君倦於副墨矣獨不儲十一歸
買田邪即歸如捆載何君笑曰公勿憂吾歸載是為一
莊矣逾三年而君歸不果卒於官實康熙甲寅年二月
七日也年七十二君初娶贈孺人陳氏亡子繼宋封孺
人生二子于國于朝皆未婚而夭及君卒宋孺人挈喪

載書板以歸立姪孫自重嗣于國將塋于盱山之原二
女長適同郡廩生周伯士次適宣州衛湯九一乙卯八
月使伯士來請銘君訓宣城好獎名士嘗葺治學宮在
范縣九年噓枯起瘠累牘蠲虛糧二千餘石民賴稍甦
奏績當內召拘限資格遷東城兵馬司累功加三級又
貧亡援故久不調卒坐外郡盜案免官君考贈承德郎
諱天民祖竹岡翁諱用遠祖自吳興徙嘉定有官博士
泗州者遂家泗之雙溝母李孺人簡經師使受業故君

欽定四庫全書

增補文獻
卷二十

承其流亦以好詞客終其身著有唐詩韻匯五十卷集
唐十三卷六書指南嘯閣文集等書君諱端教字匪莪
生明萬曆癸卯七月十七日以明經高等起家云銘曰
官不達數之奇修何闕循罔遺所篤嗜爭纂述篇籍繁
懼亡軼生於泗塋於泗魂來歸眎銘記

梅處士墓志銘

有行不出於閭而為善於一鄉者君子必書而志之曰
闡幽也千章之木或材為隆棟或產於陰崖崩谷之間

為風雨侵蝕而神明依之父老拜之其地使然也吾是
以多梅處士復予先生處士諱堯中復予其字世居水
東之梅村生某年月日卒於丁酉五月享年八十有茂
才子四人曰枝南枝喬枝鳳枝遇皆含英佩實與余交
懽而喬遇二子先處士卒處士少讀書不利退而息業
業遂振性不嗜酒褐冬葛夏人望之必斂容其與人言
孝弟農桑則娓娓至老不倦其俗急利好訟處士以和
厚御之多所存卹有稱貸而逋者或火其券常粥麻賈

客立談而許之客歸取其金踰數日至而價增一倍或勸之請益可贏中人產處士曰使吾舌而可追也則當易之吾豈市僧者流邪其高致如此會夜半所居室災處士卧閣上火然其梯二女奴熟寐牀側妻趙氏以救女奴死焉處士猶徐徐抱書契以出人皆憫趙之以慈惟災而賀處士之更生也既二十年始以疾卒鄉之人皆聚而哭於其廬豈非行不出於閭而為善於一鄉者哉余既遣使以文祭之而嗣君子先子翔請銘至再蓋

所謂枝南枝鳳者也乃次其軼事有足銘者銘曰
其樸匪野其柔匪隨非古之人兮孰使余心悲

學餘文集卷二十

欽定四庫全書

學餘堂文集卷二十一

翰林院侍讀施閏章撰

墓志銘

奉政大夫晉府左長史張公墓志銘

山陰張君荀仲與余叔父善因從其游徵其家世向往其尊大夫長史公長史公歿弔其家用是知公益詳閱十有七年荀仲來請銘予拜受教曰固所願執事也公

諱鉉字孔時在宋忠定公詠家濮陽其四世孫伯義以御史言事謫尉山陰遂家焉明成化間高祖以弘曾祖景琦並官于朝坐抗直左遷祖官至都察院右副都御史巡撫江西諱元冲考官江西右布政使諱一坤後先稱理學巡撫公尤顯嘗受業王文成學者稱浮峰先生自明以來凡四世貴顯皆名進士公胚胎仁義不繩自直聞浮峰公誦說文成心慕之年十五補諸生再中副榜終不利用恩貢受晉王府左長史王故賢者公日進

其所學論政治得失古今人臧否六籍同異嘔心奮舌
澄源塞流懃懃畢至王世子以下奉之有加禮流及國
人賢士大夫爭來學嘗與門人郊遊賦詩慕者至繪圖
傳其事王薨乃歸道作我思王十章讀者出涕是時劉
公宗周陶公奭齡講學陽明書院公與之左右片言必
錄所著就正編劉公亟稱之其未為長史時連居父母
憂號慟得嘔血疾至是遷葬浮峰公墓去舍里許日三
四往如是匝月遂疾作崇禎癸未四月二十日卒年八

十有二公嘗言道之不明壞於文人役志主司工揣摩苟得當為幸賢者茅靡背道毀方至不可救止故矯自樹立大奮于學而及其與人油然善也門人私謚曰正學先生配章氏潮州推官崑岡公女封宜人嘗侍其姑胡夫人病癰不解衣兩月中外多其賢年七十先長史公卒合葬秦望山之麓有子二人長瀨邑庠生次淑太學生女二人孫五人曾孫七人以儒世其家淑字荀仲工文詞所與游多賢豪用能闡其先人之行者也銘曰

維張四世賢且昌
顏堂閔構澤未央
有懿正學特珪璋
稽山琢石垂無疆

故藍山縣知縣侯君墓志銘

同邑侯君韓振知衡州藍山縣以順治壬辰秋死于官
既八年庚子其友施閏章返自山左立石於墓曰嗟乎
韓振君不幸以進士速死命也吾復何言然藍山之人
皆垂涕衡南之士大夫皆歎嗟鄉閭之不識者皆歆歔
詫惜以善人為不祥於乎人之所與天或怒之鬼或嫉

之矣吾何忍亡一言君諱振世字韓振先世耕且讀父
三垣力善積學老困舉子業以口授君君警朗多才藝
號能文章與余同榜登進士痛自飭謹不敢出一語先
人時湖南寇大擾而藍山衡州之南偏賊夷其城殆盡
縣令接踵死君至之日城中老弱數十家戍卒二十人
皆鳥獸震駭君請城不許請益兵又不許乃誓死守期
會征斂以時民德之賊將至里老夜告急迎脫其妻子
而君以不能禦賊免官轉側湘潭為亂兵所害年三十

一妻馮氏許氏皆未有子一子魯生出側室某氏即脫
難歸自賊中者也君兄弟三人田產千金以君仕耗費
寡稚凍飢奴僕無留者歲餘弟振倫始往湘南裹骨歸
葬於故居之側於乎君少余四歲兄事余最懽愛予文
辭余遇事疏畧君纖悉必記亡遺忘自謂慎當不敗而
卒以然既將視其孤且哀之以銘銘曰

以官往以骨歸九疑之麓湘水之湄招魂而葬兮是邪
非

封給事中蔣公暨太安人韓氏墓志銘

蔣氏在宋元豐間遠祖文忠公之奇觀文殿學士其後
自義興徙金壇又十數傳生封給事公諱應祿字子亨
為德於鄉號曰芝田翁先世孝弟力田公始好儒術生
僉事君少慧自束髮及補諸生無日不多方督其學比
成進士自台州推官入為給事中遷山東按察司僉事
無日不教以廉平使問民疾苦其與人自少至老無日
不敦樸自下既封于朝徒步城市間遇所知必握手語

有召必赴有急必周卒之日春秋八十四疏逝皆垂涕
公兄弟五人公最少失父異母兄分予壞宅公葺而安
之念無以將母棄儒而農獨奉洗腆外大父韓翁罹仇
獄陰寄公百金已而暴卒公謂匿金不祥還其家封識
如故歲乙酉江南盜起亡命相煽掠公盡所有事平吏
為捕治公堅置不問娶韓氏與公共艱苦凡公所為善
必助之力鄰嫠婦亡蚊帷撤已帷遺之操作奉姑無少
懈姑所遺瓶盎几杖寶之終身如一日就養台州敝廬

敗縷瑣細百具皆齋行謂老婦朝夕須此毋為台民累
居數年不取一帛既歸台之吏民有持金數千里為壽
者悉却去平生深識大體類偉男子僉事君之子復為
翰林院修撰畧不驚喜誠之曰士而宦如女字夫但作
得一好人為可喜耳初封孺人累封太安人與封公偕
老貴壽且康以順治庚子十二月卒春秋八十五子僉
事君諱鳴玉明丁丑進士孫二長曰超順治丁亥進士
第三人以文辭行誼名天下次曰進女孫二曾孫一顯

祖芝田公事既具大學士兩陳公誌傳中而太安人後
終修撰再拜屬銘故誌其軼事銘曰

疇士而農孝養是供維德是崇用啓其宗淑人作配曰
勤與惠維德不二慶流於世琢石納銘維固維寧千秋
萬祺維德斯馨

資深汪公墓志銘

元至正末吾鄉禮部尚書譙國郡公文節汪先生諱澤
民以家居殉國難子別駕用敬舍人用和痛哭不食相

繼死汪氏遂世以忠孝聞凡十傳而為處士公資深諱逢原吾同年友湘鄉縣令觀孝廉燦之父也少挺志槩而恥為嶄巖執謙養醇里中稱長者二子既貴不少變曰吾豈以兒輩一第重哉所居陽坡山與敬亭相望日以孝友篤其家子孫益衆乃置宅城北徒步往來手種梧竹以自娛樂賓客貴人間從其子游者求通謁為壽輒謝不見郡縣行鄉飲禮固請詣賓筵公掉頭曰若強我則南山之南矣配曰周孺人謹儉而慈相勗為善先

公卒未幾又聞湘鄉訃鬱鬱不懌遂以考終公襁褓而孤祖父母又連歿拮据讀書不得志及長子觀十歲能文即不就制舉曰是在吾子又命其次子銓燦輩次第受業伯氏拜跪如師弟子禮觀燦既並舉於鄉又皆出富平田先生門公皤然亡喜色及長公成進士知湘鄉縣公若以為憂迎養不往手勒居官十二則以示之既而湘鄉多惠政以聞母訃哀慟卒於官湘人為之俎豆公歎曰兒死能得民死亡憾矣初文節公祠燬公亟新

之曰君子將營宮室必先宗廟也其上世故籍婺源學士恭公以文鳴于宋勅賜祀田一區文節公增置若干代久浸沒公命二子清復勒石母蘇氏苦節未聞于朝念之輒淚下其敦本尚孝如此公年七十有五生萬厯戊子六月二十六日終康熙壬寅八月二十六日配周氏生萬厯己丑五月十九日終順治己亥九月二十六日得年七十有一某年月日葬某山之原子四人長觀乙未進士知湘鄉縣次銓郡諸生次燦丙戌舉人次炯

郡諸生孫六人紹隆紹霖並郡邑諸生紹洪紹楫紹陞
紹裕俱有才質孫女三曾孫女二聘字皆巨族始周孺
人孝其姑蘇氏姑且死訣曰願冥訴于神使汝多賢子
婦以相報云於乎汪氏世系文節公以前詳宋濂溪碑
銘湘鄉兄弟行業茲不具書銘曰

汪肇唐葉丕顯宋元忠孝懿節萃厥一門猗與處士匪
惟子貴亶有令聞是將式穀其後以無忝文節之子孫
陸處士墓志銘

吾里有陸舒白先生頎而髯賢而有文當領歲薦會亂
棄不就其子之瑜有父風尤好為詩予交陸氏父子而
未獲知其先世間里中父老相傳有陸孝子不能舉其
名問之瑜則戚然曰此先大父省我公也已而舒白卜
葬公於某山之原出俞子所為傳請志銘嗟乎章雖不
及見公既聞其行事敢不識其大者公弱冠為諸生束
身向學采經擷史用張其文詞試則屢困以授業生徒
終其身公之志不大遂然平生藉修脯為養未嘗有戚

容晚築一茅舍雜植蔬果手罌盎灌園客至摘蔬薦尊
簋談笑不倦少病羸治導引之術既耄而視聽不衰齒
能噬乾腊卒之日年八十有六其訓諸弟子茹實吐華
弟子皆嚴憚之人有過則微詞曉譬使人人自解會國
變士多佯狂憤世亡窮山峻谷中或以事扞法公笑曰
若將馭義和遊於廣漠之野乎抑曳尾泥中猶視息人
間世乎胡為是揭揭者公之父諱敘嘗疾篤刲股藥之
獲甦有饋粥田數畝析產之日悉讓其兄郡守金公礪

崇尚風教故嘗建高齋延先大父允升公講學者也聞其事上之提學御史以孝子旌其門故至今里中人稱陸孝子云子二長履中次諸生履素即舒白孫三人長曰之瑜餘並幼人皆謂孝子德厚其發當必大公諱可宗省我其字娶施氏勤苦相賓予從祖姑也銘曰陸氏三世皆窮于儒喟此孝子虧體若愚生以名其閭歿以光其幽墟於乎展如之愚兮我淚漣如

前孝廉張樺青先生墓志銘

往歲辛丑識武林張子祖望於湖墅告余曰先子久棄
不孝孤願有銘以葬會予赴官豫章不果作丁巳秋再
過武林張子亟以狀請蓋別去十七年矣張子以文辭
稱又所游多賢豪能言者顧獨遲十許年惟予是徵於
乎余何敢不銘公諱光球字穉青別號志林明萬厯丁
酉舉人福安知縣諱蔚然之子戊戌進士都察院右僉
都御史諱應禎之孫也兄弟凡五人公於次居三力學
善文辭抗之士莫能先焉補山陰縣學弟子員山陰之

士亦莫能先也顧自奮曰此不足為學也時有福定公高弟陳存之從事理學公復游其門而為文日進崇禎癸酉舉浙江鄉試第五人以數奇連上公車中副榜終以不第年四十三崇禎壬午九月二日卒公為人孝友忼爽有智畧始昏從父官福安署後樟樹大數十圍其土神號靈異犯者輒死母夫人偶過樹下暴病卒人皆謂樹祟也公大號哭褫神衣冠而數之欲毀其祠人皆為公懼公扶櫬歷險度仙霞嶺歸竟亡事福安公晚病

肺徹曙坐公侍側常數十夕不倦及居父喪廬墓孤山
卧起衰經是時伯兄壘已登鄉薦仲兄塔拔明經而埃
壇兩弱弟方在襁褓公遽請於兄以父田宅盡歸之兩
弟且匡其不逮一時兄弟之子如絡繹弘孫輩公手口
指畫使工為文章從弟中發貧甚公強致之授館餐遂
舉於鄉由是人人奮起諸子弟亡論售不售炳炳輩立
用張一軍皆公力也公既領袖後進士多依以成聲門
人陳潛夫者公所師存之先生子也疏狂畧細行羣從

皆不悅公獨禮遇之後卒殉國難於越又數拯人困厄
皆不避強禦不惜貨財公始生有力能挽強命中諸父
謂當受兵家言公掉頭不屑然頗懷戡亂為諸生時好
錦衣褶袖與諸子校射冀可得一試及計偕北行渡江
登金山浮淮泗慨然賦詩有誓清中原之志而卒不遇
又不屑折節為州縣故卒老田間其壯心未嘗一日忘
也福安公用治閩有聞其後閩數苦倭有章某者令福
安問治所由公報書敘其山川要害戰守便宜策如指

掌試之皆驗說者謂公才畧於此書具見焉公娶沈氏淑慎儉慈婦德咸備生子三人長綱孫即所謂祖望者也次麟孫仁和學生振孫錢塘學生孫六人郇曾沐曾演曾法曾洪曾福曾孫女四人玄孫一人於乎張氏之先河南人來遷於杭四世而顯不可勝書然世世清白又好客亡餘財今葬於某山某原以沈孺人祔蓋禮科都給諫山陰姜公希轍為之經紀其費云銘曰

張氏累葉顯用文辭公奮而登岨為人師將伸載屈云

誰則尸有偉哲嗣聲以永垂

陳文學墓志銘

文學陳君吉裘病將革余就視之客館語食頃執余手
曰此歸與君訣矣意若屬銘其藏而口不言予自許之
悲且喜別去十許日果歿家貧亡子族黨門人出錢為
殮葬於敬亭之北麓君為人性畸行介與世多不可獨
刻厲為文辭喜與貧賤失志者游籍郡為諸生有司號
知文者皆最其才明亡遂卧不就試徙家潯湖之北隱

居教授及門常數十人講藝敦行間為詩歌其徒李子
常德等日益有聞貧不能贅者收之來學曰爾力爾業
吾分爾膏火君故不善治生人間有餽不妄受兄子開
生恐其老而病也請迎養於郡又謝不往顧時時好周
人急贅壻於家脩脯所入悉以分贍至困極亡所悔暇
則聳肩苦吟村館野寺中往往題壁其與人交惟小有
缺失則切責或一善可稱則百其言至病劇猶為余說
某人某事某詩可傳屬予記之惟恐其不聞於後篤友

而樂善其性然也於乎斯人也而靳其後耶君諱祐吉
表其字父青縣尉諱可賢母徐氏遠祖諱灌字子將江
西廬陵人洪武間守寧郡有惠積遂家宣城之南街今
所稱子將舊里者也君少失父母稍長能學書宗親長
老皆趣為掾吏君大恚憤曰大丈夫讀書肯以刀筆事
人邪卒自振拔為名士至今學者稱蘧人先生君別號
也生萬厯甲辰三月二日卒康熙庚戌五月八日年六
十七妻胡氏生三女皆適士族銘曰

既窮厥身又艱厥後昆所不泯者維賢與文於乎十世
之後倘復知為先生之墳乎

處士吳公美生墓志銘

東里處士吳君居宣城之水東以康熙辛亥十一月壬
申考終於家年六十有五矣里人皆為泣歎余哭之涕
霑衣其長子易吾施氏壻也遽以銘請越數年易殯宮
葬于某山之原琢石待辭且述處士垂訣之言曰若能
與施某游吾亡憂矣是說也余嘗聞之至是稱說又相

對哭蓋不惟其舊而其人痛也宣之有吳氏城南水
東皆祖宋丞相正肅公潛而水東多韜德隱君子風氣
尤近古處士少治經生業不利慨然歎憤日取古人嘉
言懿行以澤其身以貽其後人於是二子易簡並游邑
校行立而學有聞其季紀治家人產佐二伯氏膏火三
人者油然左右無間也處士大懼晚得目疾拍兒肩以
行聞客至欣然亟出或不待扶掖留讌語至夜分不倦
山谷俗好鬪數以睚眦細故相連搆破家處士嘗力解

之蠲忿滌怨飲人以和晚自號東里處士人無問賢不
肖皆亟稱東里翁長者長者故其卒而人哀之公諱徽
明字美生後更名可敏高曾皆晦跡素善父諱有成生
子六人君第六父歿有庶子某穉弱公翼之成立既長
生子而某又夭公又撫成其孤從弟某坐法論死殫力
百救之得免明崇禎十三年大飢破貲拯貸又義率其
族間有力者存卹甚衆病且死猶出其宿券可千餘金
悉焚於榻前娶沈氏最賢嘗刲股已姑疾織紵相處士

力善逮下慈而義易簡紀三子其所出也康熙壬寅十月二十七日先卒一女嫁方氏孫三人寶國康國柱國皆幼簡字在心攻古今文辭通秦越人術善小兒醫侍父母疾甚謹處士之不懌也簡適就試旌陽學使者拔之廩食及歸而處士已卒躃踊仆地嘔血數升曰吾不得奉侍含殮也其追從於九原未幾病卒後處士僅百餘日人皆謂以孝死也吾嘗許為墓銘今附見於處士之末銘曰

野處樹德兮敦族及鄉善無弋名兮施用不彰於乎被
褐懷璞兮孰知內美維蕃罔洩兮發未有已何以徵之
視其子

文學楊子商賢墓志銘

楊氏之先山東之文登人徙宛平四世生嘉靖癸丑進
士兩淮鹽運使君璽璽生刑部郎中從善於君為大父
善生萬厯丙辰進士諱維垣累官副都御史是為君考
君字曰商賢諱彭齡籍饒順天府學自少有聞與今致

仕禮部尚書王公崇簡善而其伯子熙今為兵部尚書者嘗從受學衆推國士是時中原賊亂君方與兵部金公鉉憤切時難講用世之畧甲申春金公闔門殉闖賊難而君之考副都公初仕天啓朝負俗累見訾清流君恨不湔雪後一年副都公官南都遇變衣冠拜闕自經死妾朱氏孔氏皆殉君既幸先公得死所南收骸骨又公私痛絕遂畢意旅食老江南學宗紫陽氏于六經諸儒之書穿穴發伏上下數千言不輟口將有所論著數

舉朝聞夕死之義名其亭曰晚聞為文秀隱喜短篇追
摘舊事謂明末大臣畏臺諫臺諫樹朋黨終誤社稷其
言多切中至序忠臣烈士之篇輒嗚嗚飲泣間弼文詞
取甌石不肯作勢濫語人視之泊然而坐窮不悔京師
貴人數屬當事者餉遺終不謁謝所與游惟秣陵徐處
士延吳最舊他人罕識也妻閻氏故明兵部尚書鳴泰
女有子始萌再納姬石氏生女少慧能為君鈔詩宅近
桃葉渡僅蔽几杖雅通日者言或用其術得百錢沽酒

欣然移日予始識之顧君夢游坐上後在官相值吉州
受其詩清逸幽寒能削浮響將序而傳之君舉酒懽甚
初不言酷貧康熙癸丑十二月見余出涕曰黔婁子且
死矣恐不復見亡何果以是月二十六日卒年六十三
訃聞都下尚書王公命門人金君抱一經舉其喪葬牛
首山後其時為甲辰年十二月某日其遺集有所善淮
安郡丞于君藩許為刻行而于又死銘曰

士窮見義亦以窮不大顯於世維學是耽晚節彌勵莫

士非貧蹇獨不言有偉其篇裂眚九原於乎傷哉

外大父馬公墓志銘

公諱御璽字楚石馬姓少貧為小兒醫奉親養不給出
數歲游學遂以醫擅其家諸貴人襁褓之子爭托命焉
尊禮惟恐後公喟自奮曰是矣足發吾名哉男兒自立
貴學問於是醫稍閒輒讀書不廢卷習為詩歌與賢士
大夫遊久之聞陳九龍先生講性命之學稱贊為門人
生二子皆穎達慎選經師脩脯之外間有所須惟其意

子並成立以才行稱族之始祖墓在趙子岡為鄰葬者
侵剝族噤不敢言公界而碑之捐私錢經始為家廟作
族譜俾族人會祭有所用相親睦自敘其祖考世行乞
當世名文章者為傳銘氏族用以張顯已復泣曰吾親
生不能封歿必妥其藏維幽宮其穆卜由是延接葬師
先後數十百人奉之如嚴父母如事鬼神舟輿食飲幣
贈之費累數千金買山數十所發視之無吉壤仰天號
哭至老怏怏吞恨而卒母嘗嗜鰕日進為饌母歿禁鰕

母入庖沒齒不食張嫗以貧粥子憶之成疾公為贖歸
病輒愈鄰有橫無禮者公遜謝會其子痘劇僉謂非馬
公不救而心憚前鄰長跽請曰丐公大度活我子公大
笑卒賴以全所著有醫學諸書及淨永居詩集晚年喜
自歌咏夜飲小酣輒發聲琅琅達戶外一市人或竊笑
公益高吟不輟生嘉靖庚申二月八日卒崇禎甲戌閏
八月二十六日年七十有五配胡氏謹修婦德後公三
年以崇禎丙子九月二十三日卒合葬黃泥岡二子長

曰雲錦次曰姓並宣城縣學諸生孫男五人璠琬璿琳
瑾璠補諸生曾孫七人尚幼女子二長適趙處士國選
次歸先府君是為閨章之母累封太宜人初公游豐城
主范氏家二年具食必敬報以金不受公歸而范歿每
歲除酹酒野祭高呼范翁享我且戒二子勿忘余官江
西舅氏屬求其子孫周以粟帛至則為之加禮云銘曰
始以醫顯既以儒終志大於身目攝豪雄佳城鬱鬱北
山之麓子孫亢宗則百其祿

誥贈湯母趙太恭人墓志銘

睢州節烈婦曰趙氏封陝西按察司副使湯公諱祖契之妻江西布政司右叅政斌之母也事已表聞於

朝吳學士偉業孫徵君奇逢為之傳而叅政復以書屬予志墓於乎母可謂得死所矣當明崇禎庚辰間李自成寇河南歲比旱蝗開歸諸郡無堅城母豫為憂亂子女各一人趣令婚嫁完家事而遣子斌從伯父讀書城北之村舍戒不得數歸未幾賊陷鄰邑斌馳歸睢城閉

遶城大呼母使謂之曰湯氏不絕在子矣其急走母俱
入死地斌痛哭去聞者皆哭逾二日城陷勸夫子從姑
匿蘆葦中輒自經家人解之復入井又出之母大怒曰
汝曹奈何欲辱我語未畢賊至環脅以刃則奮袂罵曰
奴敢犯我朝廷何負若若且寸寸磔矣遂遇害蓋崇禎
十五年三月二十二日也年三十七數日收瘞顏如生
後八年子斌登順治己丑甲第巡按河南御史上其事
得詔建坊旌其里門有司又特祠於故居之側雕人榮

之母為名家女嘗通孝經列女傳事父母舅姑皆謹舅
疊齋公歿營葬以禮家益貧奉姑甘旨而自飽糠粃不
敢令姑知其子自外塾暮歸必令背誦其書燈燭不繼
則闇坐為講孝經且謂汝祖父有令德必於汝身汝慎
無忘吾言死之日猶屬家人曰若幸有脫者為語吾兒
好自愛斌用是哀憤力學浚蓄發聞始官翰林庶吉士
遷國史院檢討改陝西按察司副使備兵潼關皆稱清
慎天子推恩贈母恭人斌再遷江西右叅政嶺北道以

封公年老告歸侍養講學於鄉所謂能以孝顯者也太
恭人墓在澗岡之阡康熙三年封公卒乃合葬焉銘曰
生不逢賊孰顯節烈子非篤孝孰彰母教六珈非貴鼎
養非榮一日蹈刃百葉之名

天子有詔史氏有辭謂母而死往視廟祠

高母石太君墓志銘

湖西領三郡而蘄人高君尚孚為臨江廉平不擾郡賴
以寧居歲餘以母憂將去予愕然若奪左右臂已而請

代不得命強以墨衰視事視其睫常泫泫有淚痕久之
徒跣再拜泣曰培不獲奉母喪以歸死不塞責今行有
日矣願得公一言以志母幽宮死且無恨予請徵其狀
嗚咽不能語有間乃起曰母姓石氏年七十有二逮事
先府君僅六載稱未亡人時母年二十生不孝孤三月
耳當是時狼狽零丁內外無所倚高氏不絕如縷母誓
以身殉孤從旁睥睨者僉謂不可終日而母卒之死靡
他其拮据荼蓼以鞠以教雖百其口弗能狀也培既官

豫章母就養布衣蔬食篋中蕭然子婦或以為言母歎
曰視昔糟糠不厭時何如吾所耗侈矣培是以無敢漁
民也培旦出廳事母倚杖側耳聞脫人械則悅或筆楚
聲盈庭則愀然不食培是以無敢濫刑也襁褓而哺之
不有其身及長大有過庭跪而責之督諸婦若孫也亦
然培是以無敢傲且惰也夫母之早年苦節艱瘁百端
培幼不及知而粥粥晨昏以庶幾無隕越則母實使然
培待罪考績例當受封勲之士大夫合請之學使者將

以節行聞於朝用旌其間而母已不待言及此遂大慟
於乎有是母厥有是子信哉會顧子赤方至自蘄於母
為通家子具言石太君苦節事藉藉州里間蓋實而可
徵也乃次而為之志太君為處士玉華公女年十五歸
高贈君諱自見為諸生才而不永母嘗籲以身代事繼
姑鄧氏生死盡力有子培即尚孚官江西臨江府知府
孫二長曰克紹州庠生次曰克紘並有文行曾孫曰朝
生元生碧生凡三人康熙壬寅九月母終於臨江之官

卷二十一
舍今葬於某山某原銘曰

陵谷可移石亦可泐惟母心之匪石更終古其不磨滅

廬陵張太君墓志銘

翰林祕書院侍讀張公貞生之母太君曰李氏廬陵人也李于吉稱著姓父處士公曰子霍有隱德太君年十六歸封編修公諱其完縞綦相樂以子貴封太孺人其始生無昆弟親特憐愛之太君不以愛自逸用是以淑女聞於家其既歸張也悲不逮見其姑嘗雪涕移事祖

姑甚謹用是以孝婦聞於鄉及賢子舉進士冠南宮累
官侍讀抑抑修謹動不忘親而太君之義方聞於天下
是時太君與封公皆老矣歲癸卯封公即世侍讀君南
奔執衰經踰年太君又卒侍讀君大號慟曰某不獲視
先公舍飯不即就殞以有母在今何復留視息人間宗
親見者皆聚哭累日未嘗不歎太君為難能也侍讀君
少慧而體羸封公督之嚴甫就傅示以白鹿洞學規稍
不當輒受杖至膚墳赤太君泣不敢言以是有成其官

中祕慕戀太君太君復勉以大義母內顧於是祗慎夙夜

天子召問稱旨已命典鄉試兩浙所得多名人事訖省
覲跪奉觴上兩尊人壽留旬日為宗族親黨歡入又司
業國子太君喜曰吾兒雖縻於官始終不離文字封公
少時以剛直迂俗仇者中之連公父子於獄將危公太
君悉出簪珥粥田宅訟寃得白侍讀既貴顯人或謂是
必修郤而太君悉敕勿問於乎難哉所以貽後人者莫

大於是侍讀君既與予論學往還再拜泣請銘不獲辭
銘曰

不知其母視其子匪華其詞實可紀彤管有煒待良史
吳母汪孺人墓志銘

歟吳母汪氏為邑西鄭村益明公之女處士吳君文長
之配笄而歸三十而寡又二十有二年而卒自妯娌姑
姒及鄉之姻婭婦女輩皆謂天奪我母儀俾無所矜式
至為出涕溪南吳族大而奢母獨節儉衣澣布及事舅

姑待賓客則無不盡禮飲食必旨以豐嘗歲祲道殣相屬賢處士公收瘞之仍治糜給粟贍飢者存活甚衆處士公體羸力學得瘵疾剗股藥不愈請殉不可歲乙丙之間江南多故所在揭竿起母新寡二子呱呱在側鄉里無賴爭魚肉大室不饜不已母從容調攝陰厚啖其豪黠者數人俾毋譁其黨遂定當是時里中破家者無算而母無一縷之失人皆以為能又十餘年長君補諸生能存立有家人產在廣陵為主計者所落母恚曰若

欺我未亡人邪吾斑白矣何忍使十世業委它人掃地
携二子親往校理居月餘病卒蓋其惠足以恤族里智
足以持門戶大畧若此文長公之父曰肇一叔曰大年
皆嘗從先大父受業二君之母亦汪也貲數十萬館客
盤餐皆手出先大父嘗亟稱其賢今處士之妻則冢孫
婦也用能世其家法是烏可以不志男子二人長曰熾
邑諸生次曰熿某年月日將葬母某山之麓熿來乞銘
銘曰

維吳先世汪有閩德三葉及今母儀不忒琢石幽宮徽音是式

傅節婦墓志銘

傅節婦姓吳氏十七歸當塗傅光箕箕力學善病婚未逾月朝夕侍藥餌居歲餘羹股進數四不起遂矢以死殉父母愍其少寡無子也欲奪之給歸寧強留于家使媒妁為言不聽則迫脅之又不聽乃謀絕其舅姑以它事搆傅怨婦歸傅果怒拒之曰若父仇我何婦為節

婦號哭于野終不納婦歸吳吳又不與食衆皆曰是其窮無歸也不守必矣節婦泣請其母曰假我數椽吾寧獨餓終不以一溢米累父母乃于庭隙葺茅室日夜搯女紅給饘粥鄰媼憐餉之弗受歲祲餐腐祖以活積數歲買一女奴晨樵暮汲拮据凍餓相守者四十餘年康熙辛亥十一月十七日病且死屬曰歸我尸于傳同穴瞑矣言訖而卒年六十今將以壬子三月某日合葬如其言兄士瑜屬予表之於乎婦從一而終義也節婦無

子無食難乎其為節也于傳于吳皆見逐奪之者百而
之死靡它也不吳食而吳是居幾不可無依也死而歸
傳終從夫也君子以是難節婦且俾其夫光箕箒以名
焉吳子兩若既傳其事余為之銘銘曰

其生同歡曾不累月其卒同歸萬古之宅

學餘堂文集卷二十一